
BORRADOR DO ANTEPROXECTO DE LEI DE XUVENTUDE DE GALICIA

| | |
|--|------------------|
| <u>TÍTULO PRELIMINAR. DISPOSICIÓN XERAIS.....</u> | <u>5</u> |
| <u>Artigo 1. Obxecto.....</u> | <u>5</u> |
| <u>Artigo 2. Ámbito de aplicación.....</u> | <u>5</u> |
| <u>Artigo 3. Principios reitores</u> | <u>5</u> |
| <u>TÍTULO I. ORGANIZACIÓN E DISTRIBUCIÓN DE COMPETENCIAS</u> | <u>6</u> |
| <u>CAPÍTULO I. ORGANIZACIÓN ADMINISTRATIVA.....</u> | <u>6</u> |
| <u>Artigo 4. Organización administrativa en materia de xuventude...6</u> | |
| <u>Artigo 5. Organización consultiva en materia de xuventude.....6</u> | |
| <u>CAPÍTULO II. DISTRIBUCIÓN DE COMPETENCIAS.....</u> | <u>7</u> |
| <u>Artigo 6. Competencias da Administración da Comunidade Autónoma de Galicia.....7</u> | |
| <u>Artigo 7. Competencias da Administración local.....8</u> | |
| <u>CAPÍTULO III. RELACIONES INTERADMINISTRATIVAS.....</u> | <u>9</u> |
| <u>Artigo 8. Da coordinación coa Administración local.....9</u> | |
| <u>Artigo 9. Da colaboración da Comunidade Autónoma de Galicia coa Administración local</u> | <u>9</u> |
| <u>Artigo 10. Da cooperación internacional.....9</u> | |
| <u>CAPÍTULO IV. COMITÉ GALEGO DE POLÍTICAS DE XUVENTUDE</u> | <u>10</u> |
| <u>Artigo 11. Natureza e obxecto.....10</u> | |
| <u>Artigo 12. Funcións.....10</u> | |
| <u>Artigo 13. Composición.....11</u> | |
| <u>Artigo 14. Funcionamento.....11</u> | |
| <u>CAPÍTULO V. INSTITUTO DA XUVENTUDE DE GALICIA.....</u> | <u>12</u> |
| <u>Artigo 15. Creación, natureza e finalidade.....12</u> | |
| <u>Artigo 16. Funcións.....12</u> | |
| <u>CAPÍTULO VI. ESCOLA GALEGA DE XUVENTUDE.....</u> | <u>13</u> |
| <u>Artigo 17. Creación, natureza e finalidade.....13</u> | |

| | |
|--|------------------|
| Artigo 18. Funcións..... | 13 |
| <u>CAPÍTULO VII. REXISTRO DE ENTIDADES XUVENÍS.....</u> | <u>14</u> |
| Artigo 19. Do Rexistro de Entidades Xovenís | 14 |
| <u>TÍTULO II. PLANIFICACIÓN EN MATERIA DE XUVENTUDE.....</u> | <u>15</u> |
| <u>CAPÍTULO I. DO PLAN ESTRATÉXICO DE XUVENTUDE DE GALICIA.....</u> | <u>15</u> |
| Artigo 20. Natureza e vixencia | 15 |
| Artigo 21. Obxectivos do Plan estratéxico de xuventude de Galicia | 15 |
| Artigo 22. Elaboración do Plan estratéxico de xuventude de Galicia..... | 16 |
| <u>CAPÍTULO II. SECTORES BÁSICOS DA TRANSVERSALIDADE...17</u> | <u>17</u> |
| Artigo 23. Xuventude e educación..... | 17 |
| Artigo 24. Xuventude e emprego..... | 17 |
| Artigo 25. Xuventude, creatividade e espírito emprendedor..... | 17 |
| Artigo 26. Xuventude e vivenda..... | 18 |
| Artigo 27. Xuventude, saúde e deporte..... | 18 |
| Artigo 28. Xuventude, participación e asociacionismo..... | 18 |
| Artigo 29. Xuventude e voluntariado..... | 18 |
| Artigo 30. Xuventude, información e formación..... | 18 |
| Artigo 31. Xuventude, mobilidade e turismo xuvenil..... | 19 |
| Artigo 32. Xuventude e normalización lingüística..... | 19 |
| <u>TÍTULO III. DA PARTICIPACIÓN DA XUVENTUDE</u> | <u>20</u> |
| <u>CAPÍTULO I. DISPOSICIÓN XERAIS.....</u> | <u>20</u> |
| Artigo 33. Fomento da participación xuvenil..... | 20 |
| Artigo 34. Formas de participación xuvenil..... | 20 |
| Artigo 35. Asociacionismo xuvenil..... | 20 |
| <u>CAPÍTULO II. CONSELLO ASESOR E CONSULTIVO DE XUVENTUDE DE GALICIA.....</u> | <u>21</u> |
| Artigo 36. Creación e natureza..... | 21 |
| Artigo 37. Fins do Consello Asesor e Consultivo de Xuventude de Galicia:..... | 21 |
| Artigo 38. Composición..... | 22 |
| Artigo 39. Estrutura organizativa | 23 |
| Artigo 40. Presidencia..... | 23 |
| Artigo 41. Asemblea Xeral..... | 24 |
| Artigo 42. Observatorio Galego da Xuventude..... | 25 |
| Artigo 43. Da Secretaría do Consello..... | 26 |

| | |
|--|------------------|
| <u>CAPÍTULO III. DOS CONSELLOS LOCAIS DA XUVENTUDE.....</u> | <u>26</u> |
| Artigo 44. Natureza e obxecto..... | 26 |
| <u>TÍTULO IV. DOS SERVIZOS Á XUVENTUDE</u> | <u>26</u> |
| Artigo 45. Disposición xeral..... | 27 |
| <u>CAPÍTULO I. DA REDE GALEGA DE INFORMACIÓN XUVENIL....</u> | <u>27</u> |
| Artigo 46. Información xuvenil..... | 27 |
| Artigo 47. Da Rede Galega de Información Xuvenil..... | 27 |
| Artigo 48. O Centro Coordinador de Información Xuvenil..... | 28 |
| Artigo 49. Do informador/a xuvenil e do técnico/a en xuventude. | 29 |
| <u>CAPÍTULO II. DA FORMACIÓN DA XUVENTUDE.....</u> | <u>29</u> |
| Artigo 50. Da formación da xuventude a través da educación non formal..... | 29 |
| Artigo 51. Escolas de tempo libre..... | 29 |
| <u>CAPÍTULO III. DAS ACTIVIDADES XUVENÍS.....</u> | <u>30</u> |
| Artigo 52. Definición e ámbito de aplicación..... | 30 |
| Artigo 53. Actividades de aire libre..... | 31 |
| <u>CAPÍTULO IV. DAS INSTALACIÓNS XUVENÍS.....</u> | <u>31</u> |
| Artigo 54. Tipoloxía de instalacións xuvenís..... | 31 |
| Artigo 55. A Rede de Albergues Xuvenís de Galicia..... | 32 |
| <u>CAPÍTULO V. OS CARNÉS DE SERVIZOS Á XUVENTUDE.....</u> | <u>32</u> |
| Artigo 56. Finalidade..... | 32 |
| Artigo 57. Prezos..... | 32 |
| <u>TÍTULO V. DO RÉXIME SANCIONADOR.....</u> | <u>33</u> |
| <u>CAPÍTULO I. DA INSPECCIÓN EN MATERIA DE XUVENTUDE....</u> | <u>33</u> |
| Artigo 58. Competencias da inspección..... | 33 |
| Artigo 59. Funcións da inspección..... | 33 |
| Artigo 60. Facultades de inspección..... | 34 |
| Artigo 61. Documentación da inspección..... | 34 |
| <u>CAPÍTULO II. INFRACCIÓN E SANCIÓN.....</u> | <u>34</u> |
| Artigo 62. Clasificación das infraccións..... | 34 |
| Artigo 63. Infraccións leves..... | 35 |
| Artigo 64. Infraccións graves..... | 35 |
| Artigo 65. Infraccións moi graves..... | 36 |
| Artigo 66. Sancións..... | 36 |
| Artigo 67. Competencia..... | 38 |
| Artigo 68. Suxeitos responsables..... | 38 |
| Artigo 69. Prescrición..... | 38 |

| | |
|--|------------------|
| <u>Artigo 70. Procedemento.....</u> | <u>38</u> |
| <u>DISPOSICIÓN ADICIONAIS.....</u> | <u>38</u> |
| <u>Primeira. Título competencial</u> | <u>39</u> |
| <u>Segunda. Extinción do Consello da Xuventude de Galicia.....</u> | <u>39</u> |
| <u>DISPOSICIÓN TRANSITORIAS.....</u> | <u>39</u> |
| <u>Primeira. Comisión xestora do Consello Asesor e Consultivo da Xuventude de Galicia.....</u> | <u>39</u> |
| <u>Segunda. Convocatoria do Comité Galego de Políticas de Xuventude.....</u> | <u>40</u> |
| <u>DISPOSICIÓN DERROGATORIA.....</u> | <u>40</u> |
| <u>Única. Derrogación normativa.....</u> | <u>40</u> |
| <u>DISPOSICIÓN FINAIS.....</u> | <u>41</u> |
| <u>Primeira. Desenvolvemento normativo.....</u> | <u>41</u> |
| <u>Segunda. Entrada en vigor.....</u> | <u>41</u> |

TÍTULO PRELIMINAR. DISPOSICIÓN XERAIS

Artigo 1. Obxecto

1. A presente lei ten por obxecto establecer o marco normativo e competencial que regule, no ámbito territorial da Comunidade Autónoma de Galicia, os instrumentos necesarios para desenvolver as políticas públicas dirixidas á xuventude garantindo a súa activa participación.

2. As políticas públicas dirixidas á xuventude terán como finalidade mellorar a calidade de vida da xente nova, especialmente a través do acceso á información en materia xuvenil e mediante a participación activa dos mozos e mozas no desenvolvemento sostible, económico e social da Comunidade Autónoma de Galicia.

Artigo 2. Ámbito de aplicación

1. A presente lei será de aplicación ás persoas novas residentes na Comunidade Autónoma de Galicia, ou ás que, residindo no estranxeiro, tivesen a súa última veciñanza administrativa en Galicia, así como ás persoas físicas ou xurídicas, públicas e privadas, que desenvolvan actividades que incidan na xente nova.

2. Para os efectos desta lei, terán a consideración de persoas novas as que teñan idades comprendidas entre os catorce e os trinta anos, ambos inclusive.

Artigo 3. Principios reitores

1. Son principios reitores, que informan as prescricións da presente lei:

- a) Planificación e integralidade: o principio de planificación procura establecer unha visión a curto, medio e longo prazo dos obxectivos que deben acadar as políticas integrais de xuventude, contemplando todos os aspectos que incidan nestas políticas, dando así cumprimento á integralidade, e destinándose estas políticas a toda a xuventude considerada dun xeito universal.
- b) Transversalidade e coordinación: o principio de transversalidade implica que, na toma de decisións en todos os ámbitos sectoriais e territoriais dentro da nosa comunidade autónoma, débense ter en conta a visión e a opinión da xuventude, de xeito que se acade unha completa coordinación cos distintos departamentos da Xunta de Galicia e coas entidades que integran a Administración local.
- c) Participación e pluralidade: estes principios supoñen a integración de todos os actores implicados nas políticas de xuventude, mediante a colaboración na súa construción a través dos instrumentos recollidos na presente lei. Abarcaranse todos os ámbitos ideolóxicos para

acadar unha política plural, que enxalce os valores democráticos da dignidade humana, o libre desenvolvemento da personalidade, a liberdade, a potenciación da convivencia, a paz, a tolerancia e a solidariedade.

- d) Igualdade: este principio supón unha constante preocupación cara á efectiva corrección das desigualdades, con especial atención ás desigualdades por razón de sexo, as situacións de risco de exclusión social e marxinalidade, así como as que sexan consecuencia dos desequilibrios territoriais existentes en Galicia.
- e) Información e formación continua: estes principios son garantía e presuposto previo da participación da xuventude. Neles prestarase especial atención ao acceso universal á sociedade da información, á aprendizaxe social, á innovación e á calidade da información e do ensino.
- f) Eficacia e eficiencia: estes principios implican o deber das Administracións públicas de acadar os seus obxectivos, e facelo cos mínimos recursos posibles, de xeito que se consiga unha racionalidade no uso dos medios materiais e humanos, evitando duplicidades.

TÍTULO I. ORGANIZACIÓN E DISTRIBUCIÓN DE COMPETENCIAS

CAPÍTULO I. ORGANIZACIÓN ADMINISTRATIVA

Artigo 4. Organización administrativa en materia de xuventude

1. Para a execución das competencias en materia de xuventude, a Comunidade Autónoma de Galicia conta coa seguinte organización administrativa:

- a) Departamento competente en materia de xuventude
- b) Comité Galego de Políticas de Xuventude
- c) Instituto da Xuventude de Galicia
- d) Escola Galega da Xuventude
- e) Rexistro de entidades xuvenís

Artigo 5. Organización consultiva en materia de xuventude

1. A Comunidade Autónoma de Galicia contará cos seguintes órganos asesores, consultivos e de participación:

- a) O Consello Asesor e Consultivo de Galicia en materia de xuventude
- b) O Observatorio da Xuventude

CAPÍTULO II. DISTRIBUCIÓN DE COMPETENCIAS

Artigo 6. Competencias da Administración da Comunidade Autónoma de Galicia

1. A Administración da Comunidade Autónoma de Galicia exercerá as súas competencias a través do departamento competente en materia de xuventude ao que lle corresponden as seguintes funcións:

- a) A xestión das actuacións en materia de xuventude, así como as políticas xuvenís de carácter interdepartamental e de apoio ao desenvolvemento da actividade xuvenil.
- b) A planificación en materia de xuventude, especialmente a través do Plan estratéxico de xuventude de Galicia.
- c) A coordinación na elaboración, execución e avaliación das políticas transversais de xuventude.
- d) O fomento da participación da xuventude na vida social, especialmente mediante o asociacionismo xuvenil e a participación no Consello Asesor e Consultivo de Galicia en materia de xuventude e nos consellos locais.
- e) A coordinación e a supervisión do funcionamento dos centros, tanto propios como dependentes doutras entidades, e a prestación da asistencia técnica necesaria para dar un servizo de calidade.
- f) O fomento das relacións e da cooperación coas entidades da Administración local galega e con outras comunidades autónomas.
- g) O fomento da mobilidade xuvenil, do turismo para mozos e mozas e dos intercambios xuvenís, tanto no ámbito da Comunidade Autónoma de Galicia, coma no resto do Estado e no ámbito internacional.
- h) A xestión e funcionamento do Instituto da Xuventude de Galicia.
- i) A xestión e o funcionamento da Escola Galega da Xuventude.
- j) O seguimento na xestión da Rede Galega de Información e Documentación Xuvenil, a súa promoción e desenvolvemento en coordinación cos centros de información do Estado español e das comunidades autónomas, procurando prestar un servizo innovador e de calidade.

- k) A coordinación das funcións informativas e de documentación dos servizos da Rede Galega de Información e Documentación Xuvenil e a coordinación dos servizos prestados na Rede Galega de Centros de Xuventude, Espacio Xove.
- l) A xestión do rexistro autonómico das entidades de participación xuvenil nos termos que establece a presente lei.
- m) O ditado das disposicións de carácter xeral en materia de xuventude.
- n) O exercicio do réxime de inspección, supervisión e control das prestacións de servizos á xuventude levadas a cabo por outras Administracións públicas e entidades privadas nos termos previstos nesta lei e no regulamento que a desenvolva.
- o) O exercicio da potestade sancionadora que lle confira a presente lei e o seu regulamento de desenvolvemento.
- p) Calquera outra relacionada coa mocidade e que non estea atribuída expresamente a outro departamento da Xunta de Galicia.

Artigo 7. Competencias da Administración local

1. No marco dos principios recollidos no artigo 2 da Lei 7/1985, do 2 de abril, de bases de réxime local, e de conformidade co establecido na lexislación complementaria de Galicia en materia de réxime local, as entidades da Administración local poderán asumir as seguintes competencias en materia de xuventude:

-)a A planificación local en materia de xuventude no marco do Plan estratéxico de xuventude de Galicia, e co asesoramento, se o precisan, do Instituto da Xuventude de Galicia.
-)b A xestión das políticas que en materia de xuventude lle fosen delegadas pola Administración xeral da Comunidade Autónoma de Galicia como consecuencia da sinatura de convenios ou outros instrumentos de colaboración de natureza análoga, dentro do marco de cooperación da Xunta de Galicia coa Administración local.
-)c A creación, o mantemento e a xestión das actividades, servizos e equipamentos dirixidos á mocidade que se consideren necesarios para garantir unha política integral de xuventude.
-)d A programación municipal de servizos á xuventude, de acordo co establecido na planificación municipal e no Plan estratéxico de xuventude de Galicia.

-)e A creación e o mantemento das oficinas e puntos de información para a mocidade, que se integrarán na Rede Galega de Información Xuvenil.
-)f A promoción e o impulso do asociacionismo xuvenil como canle de participación en todas as ordes da vida municipal.
-)g O impulso da creación de consellos locais de xuventude de conformidade coa presente lei.
-)h A promoción da colaboración con entidades de carácter privado que lle presten servizos á xuventude no seu ámbito territorial.

2. As deputacións provinciais, de conformidade co previsto na normativa de réxime local, proporcionarán apoio económico, técnico e xurídico aos concellos na execución das súas competencias.

CAPÍTULO III. RELACIÓNS INTERADMINISTRATIVAS

Artigo 8. Da coordinación coa Administración local

1. A Comunidade Autónoma de Galicia será a Administración competente para coordinar a execución das políticas públicas en materia de xuventude no territorio de Galicia, garantindo a coherencia na asignación dos recursos públicos e procurando unha adecuada vertebración territorial, sen prexuízo da autonomía local.

2. A planificación estratéxica local en materia de xuventude deberá respectar o establecido no Plan estratéxico de xuventude de Galicia, co obxecto de evitar duplicidades e optimizar os recursos públicos.

Artigo 9. Da colaboración da Comunidade Autónoma de Galicia coa Administración local

1. O departamento competente da Xunta de Galicia en materia de xuventude facilitará apoio xurídico, económico e técnico aos municipios de Galicia no desenvolvemento dos seus programas e servizos á xuventude, e no marco do Plan estratéxico de xuventude de Galicia.

2. A asistencia aos municipios prestará unha especial atención á constitución dos consellos locais de xuventude así como á elaboración da planificación estratéxica local en materia de xuventude.

Artigo 10. Da cooperación internacional

1. A Comunidade Autónoma de Galicia apoiará as accións e programas de promoción de políticas de xuventude que se establezan no seo da Unión Europea, colaborando, de igual xeito, coas iniciativas europeas cuxos fins teñan por destinatarios a entidades de iniciativa social que precisen do apoio de institucións públicas.

2. A Comunidade Autónoma de Galicia, a través do órgano competente en materia de xuventude, potenciará a difusión da conciencia europea entre a poboación nova de Galicia, mediante programas de intercambio coa mocidade e asociacións xuvenís, así como por medio da súa participación en iniciativas de promoción internacional que acheguen as sensibilidades e intereses dos máis novos.

3. A Comunidade Autónoma de Galicia impulsará iniciativas de cooperación cos centros galegos no exterior que teñan por finalidade desenvolver programas dirixidos á mocidade de ascendencia galega. Do mesmo xeito, impulsará os intercambios recíprocos entre a xuventude galega e a destes centros galegos no exterior.

CAPÍTULO IV. COMITÉ GALEGO DE POLÍTICAS DE XUVENTUDE

Artigo 11. Natureza e obxecto

1. Créase o Comité Galego de Políticas de Xuventude como o órgano colexiado de coordinación interdepartamental adscrito ao departamento competente en materia de xente nova. A súa misión é a de establecer as bases que vertebran o Plan estratéxico de xuventude de Galicia, de xeito que se acade a transversalidade e coordinación cos distintos departamentos da Xunta de Galicia nas políticas públicas en materia de mocidade.

Artigo 12. Funcións

1. Son funcións específicas do Comité Galego de Políticas de Xuventude as seguintes:

- a) Estudar, analizar e informar dos problemas da mocidade galega, elevando, de ser o caso, propostas de medidas concretas ao Consello da Xunta de Galicia, por medio do departamento competente en materia de xuventude.
- b) Establecer as directrices que servirán de base ao Plan estratéxico de xuventude de Galicia.
- c) Priorizar e coordinar os obxectivos das políticas transversais de xuventude cos distintos departamentos da Xunta de Galicia.

- d) Avaliar os resultados das citadas políticas transversais de xuventude e do Plan estratéxico de xuventude de Galicia, así como do cumprimento dos obxectivos e finalidades dos programas que se executen no marco do devandito plan.

Artigo 13. Composición

1. O Comité Galego de Políticas de Xuventude estará composto polos seguintes membros:

- a) Presidencia: a persoa titular da Presidencia da Xunta de Galicia.
- b) Vicepresidencia: a persoa titular do departamento competente en materia de xuventude.
- c) Secretaría: un/unha funcionario/a con nivel orgánico de subdirección xeral adscrito/a ao órgano superior competente en materia de xuventude.
- d) Vogalías, onde deberá existir a seguinte representación:
 - i. Departamentos da Xunta de Galicia nos seguintes termos:
 - 1. Os/as titulares das secretarías xerais dependentes da Presidencia da Xunta de Galicia.
 - 2. O órgano superior competente en materia de xuventude.
 - 3. Un/Unha representante, con nivel orgánico de secretario/a xeral ou director/a xeral de cada un dos departamentos da Xunta de Galicia designados polo titular do departamento respectivo.
 - ii. Un/unha representante da Federación Galega de Municipios e Provincias.
 - iii. Un/Unha representante do Consello Asesor e Consultivo de Xuventude de Galicia.

Para cada unha das vogalías anteriores deberase nomear unha suplencia.

Artigo 14. Funcionamento

1. O Comité Galego de Políticas de Xuventude actuará en pleno ou en comisións especializadas.

Os acordos tomarán a forma de resolución e deberán ser adoptados por maioría dos membros presentes. En caso de empate decide o voto da presidencia.

2. O pleno está formado por todos os membros do Comité Galego de Políticas de Xuventude, e reunirse de xeito ordinario semestralmente, e de xeito extraordinario cando o solicite o seu presidente.

3. As comisións especializadas estarán formadas polos membros do Comité que decida o pleno, segundo as materias e prioridades fixadas no Plan estratéxico de xuventude de Galicia ou nas temáticas que determine o pleno. En ningún caso serán permanentes e extinguiranse unha vez estudado e ditaminado o asunto obxecto da súa constitución.

Así mesmo, o pleno poderá solicitar a asistencia ás comisións especializadas a persoas de recoñecido prestixio, que acudirán con voz pero sen voto.

4. En ningún caso a asistencia ás xuntanzas do pleno e ás comisións especializadas dará dereito a percepción económica ningunha, sen prexuízo das indemnizacións por razóns de servizo que se poidan percibir segundo a normativa autonómica vixente.

5. A concreción do funcionamento do Comité Galego de Políticas de Xuventude realizarase mediante orde do departamento competente en materia de xuventude.

CAPÍTULO V. INSTITUTO DA XUVENTUDE DE GALICIA

Artigo 15. Creación, natureza e finalidade

Créase o Instituto da Xuventude de Galicia como órgano técnico especializado adscrito ao departamento competente en materia de xuventude que terá como misión a materialización dos principios de información á xente nova, formación continua en materia de mocidade e asesoramento técnico en políticas públicas de xuventude.

Artigo 16. Funcións

1. Son funcións do Instituto da Xuventude de Galicia as seguintes:

- a) A coordinación da Rede Galega de Información Xuvenil.
- b) A planificación e supervisión das actividades formativas desenvolvidas pola Escola Galega de Xuventude.
- c) A planificación, promoción, organización e coordinación de actividades destinadas á xuventude, directamente ou en colaboración con asociacións xuvenís ou outras Administracións públicas, institucións e organismos públicos e privados.

- d) A coordinación, vixilancia e rexistro das instalacións xuvenís.
- e) A xestión da Rede de Albergues Xuvenís de Galicia.
- f) A coordinación das axudas para o acceso da xente nova a determinados bens e servizos a través do carné xove, entre outros instrumentos.
- g) O fomento e a promoción de intercambios e mobilidade dos mozos/as con outras comunidades autónomas e países estranxeiros.
- h) A emisión de cantos informes lle sexan solicitados polo departamento de adscrición.
- i) Todas cantas lle sexan atribuídas expresamente por disposicións de carácter legal ou regulamentario.

CAPÍTULO VI. ESCOLA GALEGA DE XUVENTUDE

Artigo 17. Creación, natureza e finalidade

Créase a Escola Galega de Xuventude como órgano especializado na educación non formal en temas relacionados coa mocidade, adscrito ao Instituto da xuventude de Galicia.

Artigo 18. Funcións

1. Son funcións da Escola Galega de Xuventude as seguintes:
 - a) Velar polo nivel técnico das ensinanzas impartidas polas escolas de tempo libre nos termos establecidos na presente lei.
 - b) Avaliar e conformar os cursos que impartan as escolas de tempo libre.
 - c) Elaborar a programación anual de cursos e actividades formativas complementarias ás realizadas polas diferentes escolas de tempo libre e, en especial, as que teñan por obxecto a especialización en áreas concretas de coñecemento dos monitores e directores de actividades de tempo libre.
 - d) Impartir actividades formativas que teñan un carácter estratéxico e innovador con respecto á programación anual establecida na letra anterior, así como outros cursos dirixidos a técnicos de xuventude, a informadores xuvenís, a persoal das escolas de tempo libre e á mocidade en xeral.

- e) Emitir os informes e realizar os estudos que lle solicite o órgano superior competente en materia de xuventude para a xestión das actuacións dirixidas á mocidade.

2. A Escola Galega da Xuventude poderá promover a sinatura de convenios con universidades ou outros centros de formación superior coa finalidade de desenvolver traballos de investigación e formación en materia de xuventude.

CAPÍTULO VII. REXISTRO DE ENTIDADES XUVENÍS

Artigo 19. Do Rexistro de Entidades Xuvenís

1. O Rexistro de Entidades Xuvenís de Galicia créase como un rexistro administrativo de carácter público, adscrito ao órgano superior competente en materia de xuventude, onde deberán inscribirse as seguintes entidades xuvenís:

- a) As asociacións xuvenís, federacións ou unións destas, constituídas ao abeiro da Lei orgánica 1/2002, de 22 marzo, reguladora do dereito de asociación.
- b) As asociacións non xuvenís que contén con seccións xuvenís.
- c) Os consellos locais de xuventude.

2. A inscrición no Rexistro de Entidades Xuvenís ten carácter indefinido, sen prexuízo da obriga das entidades xuvenís de remitir anualmente a este a memoria de actividades antes do 1 de xuño de cada ano.

Así mesmo, as entidades estarán obrigadas a notificar calquera cambio no prazo máximo de 3 meses e calquera modificación nos datos rexistrais facilitados inicialmente.

O incumprimento desta obriga poderá levar consigo a baixa de oficio no rexistro, previa audiencia da entidade interesada.

3. O rexistro de entidades xuvenís contará ademais coas seguintes seccións:

- a) Escolas de tempo libre, onde se inscribirán as que comunicasen a declaración responsable, como requisito previo á súa incorporación á Rede de Escolas de Tempo Libre.
- b) Albergues xuvenís, onde se inscribirán os albergues de titularidade da Administracións da Comunidade Autónoma de Galicia, así como os de titularidade privada ou doutras Administracións públicas que tivesen presentada a declaración responsable de inicio de actividade, nos termos establecidos regulamentariamente.

- c) Entidades integrantes da Rede de Información e Documentación Xuvenil.

4. O réxime de organización e funcionamento do Rexistro de Entidades Xuvenís de Galicia establecerase regulamentariamente.

TÍTULO II. PLANIFICACIÓN EN MATERIA DE XUVENTUDE

CAPÍTULO I. DO PLAN ESTRATÉXICO DE XUVENTUDE DE GALICIA

Artigo 20. Natureza e vixencia

1. O Plan estratéxico de xuventude de Galicia terá natureza regulamentaria e debe aprobarse por orde do departamento competente en materia de xuventude.
2. O Plan estratéxico de xuventude de Galicia establecerá o marco de actuación plurianual, establecendo os obxectivos estratéxicos que se deben cumprir durante a súa vixencia, así como os obxectivos operativos que cómpre acadar anualmente e que contribúan á materialización dos obxectivos estratéxicos, sen prexuízo da súa revisión anual.
3. O Plan estratéxico de xuventude de Galicia será o principal instrumento para acadar a transversalidade en materia de xuventude co resto de departamentos da Xunta de Galicia, así como a coordinación coas diferentes Administracións públicas que incidan no seu ámbito de aplicación.
4. As directrices elaboradas polo Comité Galego de Políticas de Xuventude deberán servir de base para a elaboración do Plan estratéxico de xuventude de Galicia.

Artigo 21. Obxectivos do Plan estratéxico de xuventude de Galicia

1. Serán obxectivos estratéxicos do plan:
 - a) Diagnosticar a situación da mocidade galega e realizar unha análise derivada dos datos obtidos, onde se propoñan solucións aos principais problemas e necesidades da xuventude en Galicia.
 - b) Servir de instrumento para a toma de decisións políticas, elaborando as liñas estratéxicas e articulando as actuacións prioritarias públicas en materia de xuventude.
 - c) Establecer unha metodoloxía de traballo transversal que sexa a referencia para o resto de departamentos da Administración da

Comunidade Autónoma de Galicia, así como para as entidades da Administración local de Galicia.

- d) Facilitar a avaliación da efectividade das medidas adoptadas no desenvolvemento das políticas de xuventude, a través de sistemas de indicadores e cadros de mando.

Artigo 22. Elaboración do Plan estratéxico de xuventude de Galicia

1. Na elaboración do Plan estratéxico de xuventude de Galicia buscarase a colaboración efectiva das entidades de participación xuvenil e da propia poboación nova, a través de procesos de participación estruturados.

2. Para os efectos da elaboración do Plan estratéxico de xuventude de Galicia, o órgano superior competente en materia de xuventude solicitará a todos os departamentos da Xunta de Galicia un informe que conterá os seguintes extremos:

- a) As iniciativas e normativas que incidan en materia de xuventude, así como os programas e actuacións que executen ou en que participen relacionados co ámbito sectorial da mocidade.
- b) O órgano responsable da iniciativa, programa ou actuación en materia de xuventude que se vai incluír no plan.
- c) A denominación da iniciativa, programa ou actuación.
- d) A descrición da iniciativa, programa ou actuación.
- e) Os obxectivos previstos.
- f) O número de persoas potencialmente beneficiarias.
- g) O orzamento estimado.
- h) Os organismos e institucións colaboradoras.
- i) A localización territorial da actuación ou medida.
- j) Outras circunstancias de interese.

O informe descrito no parágrafo anterior deberá evacuarse no prazo máximo dun mes desde a realización da petición.

3. O Plan estratéxico de xuventude de Galicia deberá partir dunha diagnose da situación da mocidade en Galicia, que facilite o artellamento integral e transversal dos eixes de traballo que constitúan o plan.

4. Na súa formulación, o Plan estratéxico de xuventude de Galicia deberá adoptar as medidas que garantan o seu control, seguimento e avaliación.

Anualmente realizarase un seguimento do plan que será presentado ao Consello Asesor e Consultivo de Galicia e ao Comité Galego de Políticas de Xuventude.

5. Xunto co Plan estratéxico de xuventude de Galicia, deberase elaborar unha memoria económico-financeira que avalíe adecuadamente os custos que a formulación do plan leva consigo e garanta a súa viabilidade efectiva.

6. No procedemento de elaboración do Plan estratéxico de xuventude de Galicia, e con carácter previo á súa aprobación, deberá emitirse informe polo Consello Asesor e Consultivo de Xuventude de Galicia.

CAPÍTULO II. SECTORES BÁSICOS DA TRANSVERSALIDADE

Artigo 23. Xuventude e educación

1. A Xunta de Galicia, de cara á planificación e execución de políticas transversais de educación a favor da mocidade, coordinará accións e medidas de apoio, dirixidas tanto á educación formal como á non formal.

2. Constituirán obxectivos prioritarios desta planificación os seguintes:

- a) A obtención do máximo rendemento da comunidade educativa das tecnoloxías da información e do coñecemento.
- b) O apoio da educación non formal da xuventude como complemento da educación regulada, co obxecto de contribuír á aprendizaxe permanente.

Artigo 24. Xuventude e emprego

A Xunta de Galicia, promoverá políticas activas que favorezan o emprego xuvenil que terán, con carácter xeral, os seguintes obxectivos:

- a) A mellora da empregabilidade da mocidade.
- b) A mellora da adaptabilidade, co obxecto de permitir a readaptación da mocidade en situación de desemprego cara a novos sectores de emprego.
- c) A igualdade de oportunidades da mocidade no ámbito do emprego.

Artigo 25. Xuventude, creatividade e espírito emprendedor

1. A Xunta de Galicia fomentará o espírito emprendedor, potenciando entre a xuventude un sistema de actitudes e preocupacións do que formen parte

a iniciativa propia, a responsabilidade, a planificación de obxectivos vitais, a perseveranza, o compromiso e a flexibilidade.

2. A Xunta de Galicia creará medidas e accións tendentes a que a xuventude encontre facilidades para a creación do seu propio posto de traballo, así como a posta en marcha dos seus propios proxectos empresariais

Artigo 26. Xuventude e vivenda

1. A Xunta de Galicia facilitará os procesos de autonomía persoal da xuventude, desenvolvendo políticas transversais que favorezan o acceso da xente nova a unha vivenda digna.

2. Para os efectos anteriores, a Xunta de Galicia promoverá a sinatura de convenios de colaboración coas entidades da Administración local para o fomento de vivendas sometidas a algún tipo de réxime de protección.

Artigo 27. Xuventude, saúde e deporte

1. A Xunta de Galicia promoverá a saúde e os hábitos de vida saudables entre a xuventude de Galicia, por medio de políticas transversais que incidan na saúde mental e emocional, na prevención e o tratamento das drogodependencias e outras adicións, trastornos alimentarios, programas de orientación sexual, e no fomento dunha cultura de consumo racional e de ocio nocturno alternativo.

2. A Xunta de Galicia, en materia de políticas transversais de deporte, levará a cabo unha planificación multidisciplinar e estratéxica para dar unha resposta integral ao sedentarismo e ao sobrepeso na infancia, xuventude e ao longo de toda a vida, concibida para toda a poboación, xa que o deporte é un aspecto importante na mellora da calidade de vida da mocidade.

Artigo 28. Xuventude, participación e asociacionismo

As Administracións públicas galegas desenvolverán campañas de divulgación e impulso do asociacionismo xuvenil ata alcanzar a consolidación dun movemento asociativo da mocidade de Galicia.

Artigo 29. Xuventude e voluntariado

A Xunta de Galicia, na configuración de políticas transversais de xuventude, potenciará o voluntariado entre a xente nova, adaptando os seus obxectivos prioritarios e medidas ás recomendacións da Unión Europea nesta materia.

Artigo 30. Xuventude, información e formación

1. Dentro dos servizos propios da consellería competente nesta materia, atópanse a Rede Galega de Información Xuvenil e a Escola Galega da Xuventude, adscritas ao órgano superior competente en xuventude, que desenvolverán unha política transversal, en coordinación, principalmente, coas oficinas, puntos de información xuvenil e escolas de tempo libre.

2. Con relación á formación en xuventude, a Xunta de Galicia potenciará os contidos e programas da Escola Galega de Xuventude de xeito directo a través dunha acción pública ou en colaboración coa iniciativa privada.

Artigo 31. Xuventude, mobilidade e turismo xuvenil

A Xunta de Galicia potenciará a mobilidade entre a xuventude galega, desenvolvendo programas para a realización de estudos, cursos e actividades noutras comunidades autónomas do Estado español, da Unión Europea e outros países, co obxectivo de potenciar o coñecemento da diversidade e riqueza cultural, o que contribuirá á súa formación e posterior inserción laboral.

Artigo 32. Xuventude e normalización lingüística

A Administración xeral da Comunidade Autónoma de Galicia levará a cabo programas e accións de normalización lingüística dirixidas especialmente á xuventude, no marco da Lei de normalización lingüística.

TÍTULO III. DA PARTICIPACIÓN DA XUVENTUDE

CAPÍTULO I. DISPOSICIÓNS XERAIS

Artigo 33. Fomento da participación xuvenil

1. A participación xuvenil, como expresión dos valores democráticos e do pluralismo político, cultural e ideolóxico, que permite á xuventude decidir sobre o seu futuro, poderá exercerse de xeito individual ou colectivo mediante as formas de participación recollidas no artigo seguinte.

2. As Administracións públicas competentes en materia de xuventude fomentarán a máxima participación efectiva da mocidade na execución das políticas públicas da Comunidade Autónoma de Galicia, así como o impulso, fomento e consolidación do movemento asociativo xuvenil.

Artigo 34. Formas de participación xuvenil

A xuventude galega canalizará a súa participación nos asuntos públicos e na sociedade civil a través de:

- a) As asociacións xuvenís e as súas federacións.
- b) As seccións xuvenís de asociacións non xuvenís.
- c) As novas formas de asociacionismo xuvenil sen personalidade xurídica.
- d) O Consello Asesor e Consultivo de Xuventude de Galicia.
- e) Os Consellos Locais de Xuventude.

Artigo 35. Asociacionismo xuvenil

1. A xuventude galega poderá canalizar a súa participación mediante a constitución de asociacións ao abeiro da Lei orgánica 1/2002, de 22 marzo, reguladora do dereito de asociación e da Lei orgánica 1/1996, de 15 de xaneiro, de protección xurídica do menor.

2. Así mesmo, a xuventude galega poderá participar a través das seccións xuvenís de asociacións legalmente constituídas e das federacións de asociacións xuvenís constituídas conforme á lexislación vixente que lles resulte de aplicación.

3. A xuventude galega poderá participar, cando así se prevexa, en actividades, proxectos e programas, e en cantas iniciativas se determinen, a través de agrupacións de mozos e mozas non institucionalizadas, como

poden ser as plataformas, os grupos e colectivos de xente nova ou calquera outra agrupación sen personalidade xurídica.

CAPÍTULO II. CONSELLO ASESOR E CONSULTIVO DE XUVENTUDE DE GALICIA

Artigo 36. Creación e natureza

1. Créase o Consello Asesor e Consultivo de Xuventude de Galicia, como órgano colexiado de participación, representación e consulta das políticas públicas da Xunta de Galicia en materia de xuventude.
2. O Consello Asesor e Consultivo de Xuventude de Galicia estará integrado no departamento competente en materia de xuventude, sen prexuízo da súa autonomía, pero non participará na estrutura xerárquica do departamento.
3. O departamento competente en materia de xuventude facilitará ao Consello Asesor e Consultivo de Xuventude de Galicia os medios persoais e materiais necesarios para o exercicio das funcións recollidas na presente lei.

Artigo 37. Fins do Consello Asesor e Consultivo de Xuventude de Galicia:

1. Son fins do Consello Asesor e Consultivo de Xuventude de Galicia:
 - a) Representar a xuventude galega a través da súa condición de membro de pleno dereito no Comité Galego de Políticas de Xuventude.
 - b) Emitir os informes que afecten á xuventude e lle sexan solicitados polo Comité Galego de Políticas de Xuventude ou polo órgano superior competente en materia de xuventude.
 - c) Emitir informe sobre o impacto na xente nova dos proxectos de disposicións normativas promovidas pola Administración xeral da Comunidade Autónoma de Galicia que afecten á mocidade.
 - d) Analizar, con carácter permanente, a situación da xente nova en Galicia, facilitando así a toma de decisións, e especialmente as problemáticas que incidan maiormente na mocidade galega, a través do Observatorio Galego da Xuventude.
 - e) Contribuír á institucionalización do movemento asociativo xuvenil de Galicia, consolidando, por un lado, o xa existente e, por outro, promovendo a creación de asociacións xuvenís de distinta natureza.

- f) Garantir a participación activa e dinámica da xuventude en todas as ordes da vida social, educativa, laboral, política, económica, deportiva, de ocio, tempo libre e cultural de Galicia.
- g) Representar a xuventude de Galicia no Consello da Xuventude de España así como noutros organismos de ámbito estatal, europeo e internacional dos que poida ser membro de pleno dereito.
- h) Establecer relacións de cooperación e colaboración con outros consellos da xuventude do Estado español.-
- i) Elevar propostas de acción ao departamento competente en materia de xuventude.
- j) Defender os intereses da xente nova, presentando ante os organismos públicos e privados correspondentes as medidas tendentes a facer efectivos os intereses que lle corresponden á xuventude.

Artigo 38. Composición

1. O Consello Asesor e Consultivo de Xuventude de Galicia estará integrado polas entidades de participación xuvenil que se detallan no parágrafo segundo do presente artigo.

2. Poderán ser membros do Consello Asesor e Consultivo de Xuventude de Galicia as seguintes entidades de participación xuvenil:

- a) As asociacións xuvenís de calquera natureza, legalmente constituídas que, carecendo de ánimo de lucro, figuren rexistradas e clasificadas no Rexistro de Entidades Xuvenís de Galicia, como asociacións de ámbito autonómico.
- b) As federacións, confederacións ou unións de asociacións xuvenís, inscritas no Rexistro de Entidades Xuvenís de Galicia, de ámbito estatal, autonómico ou local, compostas, como mínimo, por tres asociacións con organización e implantación propia. A súa incorporación exclúe á dos seus membros de xeito independente.
- c) Os consellos locais de xuventude.
- d) As seccións ou organizacións xuvenís dos partidos políticos.
- e) As seccións ou organizacións xuvenís dos sindicatos e asociacións empresariais.
- f) As organizacións estudiantís que desenvolvan a súa actividade no ámbito territorial da Comunidade Autónoma de Galicia.
- g) As seccións xuvenís das demais asociacións de ámbito autonómico de calquera natureza, que figuren rexistradas e

clasificadas no Rexistro de Entidades Xuvenís de Galicia, se cumpren os seguintes requisitos:

- i) Que estatutariamente teñan recoñecidas autonomía funcional, organización e goberno propio para as materias especificamente xuvenís.
- ii) Que os asociados á sección xuvenil o sexan de modo expreso, por acto manifesto de asociación.
- iii) Que á representación xuvenil lle correspondan órganos propios.

3. A través do Regulamento de réxime interno do Consello Asesor e Consultivo de Xuventude de Galicia determinarase a súa composición, garantido en todo caso unha participación equitativa e obxetivable das entidades mencionadas no apartado segundo do presente artigo.

En todo caso, esta composición garantizará que as categorías de entidades sinaladas nas letras a) e c) do apartado 2 do presente artigo dispoñan como mínimo do 51% da representación no voto.

Artigo 39. Estrutura organizativa

1. Para os efectos de garantir un eficaz funcionamento interno democrático, o Consello Asesor e Consultivo da Xuventude de Galicia organizarase do seguinte xeito:

- a) A Presidencia
- b) A Asemblea Xeral
- c) O Observatorio Galego da Xuventude, que actuará como comisión permanente
- d) A Secretaría

2. O Regulamento de réxime interior do Consello Asesor e Consultivo de Xuventude de Galicia desenvolverá a organización e o funcionamento do Consello.

3. En ningún caso a asistencia ás xuntanzas da Asemblea Xeral e do Observatorio, ou, de ser o caso, dos grupos de traballo, dará dereito a percepción económica ningunha, sen prexuízo das indemnizacións por razóns de servizo que se poidan percibir segundo a normativa autonómica vixente.

Artigo 40. Presidencia

1. A presidencia do Consello Asesor e Consultivo de Xuventude de Galicia terá as seguintes funcións:

- a) Exercer a representación do Consello.
- b) Acordar a convocatoria das xuntanzas ordinarias e extraordinarias e a fixación da orde do día do Consello e do Observatorio, tendo en conta, de ser o caso, as peticións dos demais membros formuladas coa suficiente antelación.
- c) Presidir as xuntanzas da Asemblea Xeral e do Observatorio, moderar o desenvolvemento dos debates e suspendelos por causas xustificadas.
- d) Dirimir co seu voto os empates, para os efectos de adoptar acordos.
- e) Visar as actas e as certificacións dos acordos da Asemblea e do Observatorio.
- f) Adoptar as medidas necesarias para asegurar o cumprimento do regulamento de réxime interior, das funcións do Consello e dos acordos ditados por este.

2. A presidencia nomeará unha vicepresidencia, de entre os membros do Consello, para a substitución nos casos de vacante, ausencia, enfermidade ou outra causa legal.

Artigo 41. Asemblea Xeral

1. A Asemblea Xeral está integrada por todos os membros do Consello Asesor e Consultivo da Xuventude de Galicia, e ostentará as seguintes atribucións:

- a) Aprobar as liñas xerais de actuación do Consello da Xuventude de Galicia.
- b) Aprobar ou modificar o Regulamento de réxime interior do Consello da Xuventude de Galicia por unha maioría cualificada de dous terzos dos seus membros.
- c) Elaborar e elevar as propostas que considere necesarias para mellorar a calidade de vida da xuventude galega.
- d) Emitir os informes e ditames que lle sexan solicitados polos distintos órganos regulados na presente lei.
- e) Informar dos proxectos de disposicións normativas promovidas pola Administración xeral da Comunidade Autónoma de Galicia que lle afecte á xuventude.

No caso das iniciativas legislativas, o informe terá lugar no momento da participación regulada na Lei 4/2006, de 30 de xuño, de transparencia e boas prácticas na Administración pública galega. No caso de disposicións xerais de carácter xeral, terá lugar na fase intermedia nos termos do parágrafo segundo do artigo 42 da Lei 16/2010, do 17 de decembro, de organización e funcionamento da Administración xeral e do sector público autonómico de Galicia.

- f) Designar, de entre os seus membros, os representantes do Consello Asesor e Consultivo da Xuventude de Galicia no Observatorio Galego de Xuventude.
- g) Designar, de entre os seus membros, os representantes do Consello Asesor e Consultivo da Xuventude de Galicia no Consello da Xuventude de España e no Comité Galego de Políticas de Xuventude.
- h) Aprobar a memoria anual do Consello Asesor e Consultivo da Xuventude de Galicia.
- i) Admitir novos membros no Consello Asesor e Consultivo da Xuventude de Galicia e determinar o número de membros de cada entidade na Asemblea Xeral, así como proceder á exclusión de membros por motivos de grave incumprimento nos termos do establecido no Regulamento de réxime interior.

2. A Asemblea Xeral poderá delegar as atribucións sinaladas na letras d), e), i) do apartado anterior, no Observatorio Galego da Xuventude, sen prexuízo da necesaria ratificación da Asemblea Xeral das admisións e exclusións, que serán provisionais ata que se produza esta.

3. A Asemblea Xeral poderá constituír grupos de traballo específicos para o estudo e informe de problemáticas concretas, cuxos resultados serán presentados ante esta asemblea.

4. Dos acordos adoptados pola Asemblea Xeral daráselle traslado ao departamento competente en materia de xuventude para o seu coñecemento e execución.

Artigo 42. Observatorio Galego da Xuventude

1. No seo do Consello Asesor e Consultivo de Galicia, actuará como comisión permanente o Observatorio Galego de Xuventude, que terá como obxectivo establecer un sistema de información permanente sobre a situación da xuventude en Galicia, proporcionando datos para os efectos da realización de estatísticas e a toma de decisións.

2. Con carácter anual, presentará informes de conxuntura xuvenil, nos que se reflectan as principais variables sociais e se formulen propostas e recomendacións tendentes a promover o desenvolvemento das políticas xuvenís en Galicia, especialmente en materia de emprego e vivenda.

3. A súa composición e o seu réxime de funcionamento estableceranse no regulamento de réxime interno do Consello Asesor e Consultivo de Galicia.

Artigo 43. Da Secretaría do Consello

1. Actuará como secretario, tanto da Asemblea Xeral, como do Observatorio, un empregado público designado polo órgano superior competente en materia de xuventude, que actuará con voz e sen voto.

2. Correspóndelle ao secretario:

- a) Preparar, cursar a orde do día e notificar as convocatorias das reunións da Asemblea Xeral e do Observatorio, de acordo coas instrucións do presidente/a.
- b) Asistir, con voz pero sen voto, ás sesións da Asemblea Xeral e do Observatorio, levantando actas destas.
- c) Desenvolver as tarefas administrativas do Consello.
- d) Expedir as certificacións oficiais dos contidos dos acordos, ditames, votos particulares e outros documentos confiados á súa custodia co visto e prace do presidente/a.
- e) Realizar as demais funcións que lle atribúa o Regulamento de réxime interior.

CAPÍTULO III. DOS CONSELLOS LOCAIS DA XUVENTUDE

Artigo 44. Natureza e obxecto

1. Sen prexuízo das competencias municipais de cara á regulación destes órganos, os consellos locais de xuventude constitúense, para os efectos desta lei, como órganos de representación e consulta das distintas Administracións locais, e estarán formados por todas as organizacións e entidades xuvenís que actúan dentro do ámbito territorial respectivo, segundo a regulación de cada ente local.

2. Os consellos locais de xuventude formarán parte do Consello da Xuventude de Galicia, de acordo co establecido na presente lei. Para estes efectos, deberase notificar ao órgano superior competente en materia de xuventude a constitución e composición dos consellos.

-

TÍTULO IV. DOS SERVIZOS Á XUVENTUDE

Artigo 45. Disposición xeral

1. Os servizos á xuventude regulados neste título son prestados directamente polo órgano superior competente en materia de xuventude, en colaboración con outros departamentos da Xunta de Galicia e das Administracións locais, así como por entidades privadas, baixo os requisitos e condicións que se establezan regulamentariamente.

2. Son servizos prestados á Xuventude, entre outros, os seguintes:

- a) A Rede Galega de Información Xuvenil
- b) A educación non formal para a xuventude
- c) As actividades xuvenís
- d) A Rede de Albergues Xuvenís
- e) O carné xove

CAPÍTULO I. DA REDE GALEGA DE INFORMACIÓN XUVENIL

Artigo 46. Información xuvenil

1. En cumprimento do principio reitor de información á mocidade establecido na presente lei, o departamento competente en materia de xuventude deberá establecer os mecanismos oportunos que garantan o acceso universal a toda a información xuvenil.

2. Para os efectos da presente lei, a información xuvenil é unha actividade de busca, tratamento e difusión da información xunto co asesoramento e orientación prestados á mocidade nos servizos de información xuvenil. O obxecto destes é pór á súa disposición os elementos necesarios para unha mellor toma de decisións no exercicio da súa liberdade, autonomía e que fagan posible unha plena integración na sociedade.

Artigo 47. Da Rede Galega de Información Xuvenil

1. A Rede Galega de Información Xuvenil configúrase como un servizo público, adscrito ao órgano superior competente en materia de xuventude, de carácter gratuíto e de estrutura territorial que articula e coordina as iniciativas promovidas tanto por organismos públicos como por entidades privadas sen ánimo de lucro. Ten como obxectivos prioritarios os seguintes:

- a) Asegurar que as prestacións dos servizos de información xuvenil se desenvolvan en condicións de eficacia e calidade.
- b) Colaborar con outros organismos de natureza análoga de ámbito nacional, europeo e internacional.
- c) Garantir a difusión da información xuvenil de maneira ampla e actualizada en todo o ámbito territorial da Comunidade Autónoma de Galicia.

- d) Favorecer a implantación dos mecanismos para que a información, a orientación e o asesoramento á xuventude se baseen nos principios da Carta ERYCA, garantindo a igualdade, independencia, calidade e atención persoal á xuventude, e respectando a confidencialidade e o anonimato do usuario e posibilitando a igualdade de oportunidades.
- e) Promover a máxima difusión de información a través das tecnoloxías da información e comunicación, especialmente a través de internet e das súas redes sociais.

2. A Rede Galega de Información Xuvenil canaliza toda a información para a mocidade a través do centro coordinador de información xuvenil, mediante os seguintes instrumentos:

- a) As oficinas locais de información xuvenil.
- b) Os puntos de información xuvenil, promovidos tanto polos concellos coma por entidades privadas, segundo se determine regulamentariamente.
- c) As oficinas de orientación e asesoramento especializado en xuventude.
- d) A Rede galega de Centros de Xuventude. Espazo Xove.

3. As entidades que formen parte da Rede Galega de Información Xuvenil deberán exhibir o logotipo que se estableza regulamentariamente nas súas dependencias.

4. Regulamentariamente, desenvolverase o procedemento para integrarse e o funcionamento da Rede Galega de Información Xuvenil.

Artigo 48. O Centro Coordinador de Información Xuvenil

1. O Centro Coordinador da Rede Galega de Información Xuvenil é unha unidade adscrita orgánica e funcionalmente ao órgano superior competente en materia de xuventude da Xunta de Galicia.

2. O Centro Coordinador terá como funcións:

- a) Coordinar o conxunto dos servizos de información xeral ou especializada da Rede Galega de Información Xuvenil.
- b) Recoller, catalogar, elaborar e distribuír canta información sexa de interese para os mozos e mozas.

- c) Cooperar con entidades, organizacións e institucións públicas ou privadas na elaboración e execución dos servizos, programas e actividades de información á xuventude.
- d) Organizar accións formativas dirixidas ao persoal dos servizos de información xuvenil e á mocidade en xeral en colaboración coa Escola Galega de Xuventude.
- e) Asesorar a outras entidades públicas ou privadas sobre a creación e a apertura de servizos de información xuvenil.
- f) Colaborar tecnicamente co Observatorio Galego da Xuventude.

3. O Centro Coordinador contará coa dotación de persoal necesaria para levar a cabo o exercicio das súas funcións xerais e de coordinación da Rede Galega de Información e Documentación Xuvenil.

Artigo 49. Do informador/a xuvenil e do técnico/a en xuventude

1. O informador/a xuvenil será a persoa ou entidade que organice e xestione servizos de información xuvenil, levando a cabo accións de información e dinamización, e promovendo actividades sociais e educativas orientadas a facer efectiva a igualdade de oportunidades ou o desenvolvemento integral da xuventude.

2. O técnico/a en xuventude será o profesional universitario que orienta e asesora en materia especializada en mocidade e planifica actuacións nesta materia.

3. O acceso á condición de informador/a xuvenil e de técnico/a en xuventude e as súas funcións estableceranse regulamentariamente.

CAPÍTULO II. DA FORMACIÓN DA XUVENTUDE

Artigo 50. Da formación da xuventude a través da educación non formal

A Administración xeral da Comunidade Autónoma de Galicia promoverá e coordinará as actividades de formación da xuventude no ámbito da educación non formal, a través da Escola de Xuventude e da rede de escolas de tempo libre de Galicia.

Artigo 51. Escolas de tempo libre

1. As escolas de tempo libre constitúen centros de formación, perfeccionamento e especialización nas actividades técnicas orientadas á promoción e axeitada utilización do ocio e do tempo libre.

Poden ser promovidas por persoas físicas ou xurídicas, de carácter tanto público como privado, a través do procedemento que se estableza regulamentariamente.

2. As escolas tempo libre poderán actuar como tales logo de formular a correspondente declaración responsable ante o órgano superior competente en materia de xuventude nos termos que regulamentariamente se estableza.

En todo caso, os interesados disporán na páxina web do departamento competente en materia de xuventude de toda a información necesaria, a través dunha xanela única onde poidan realizar todas os trámites necesarios para levar a cabo a prestación destes servizos.

3. Realizada a declaración responsable, as escolas pasarán a integrar a Rede de Escolas de Tempo Libre de Galicia, mediante a inscrición no rexistro regulado na presente lei, e seralles de aplicación o establecido nesta lei e na súa normativa de desenvolvemento.

4. As escolas de tempo libre, integradas na Rede, impartirán as seguintes modalidades de ensino:

- a) Cursos de primeiro nivel, cuxa titulación se corresponde coa de monitores de actividades de tempo libre.
- b) Cursos de segundo nivel, cuxa titulación se corresponde coa de director de actividades de tempo libre e director de campos de traballo.

Así mesmo, poderán impartir calquera outra formación correspondente ao seu ámbito de actuación no eido da xuventude.

5. O órgano superior competente en materia de xuventude procederá á expedición dos correspondentes títulos, baixo os principios e requisitos contidos na normativa que, en desenvolvemento da presente lei, lle resulte de aplicación.

CAPÍTULO III. DAS ACTIVIDADES XUVENÍS

Artigo 52. Definición e ámbito de aplicación

1. Para os efectos da presente Lei, revisten a condición de actividades xuvenís aquelas actuacións desenvolvidas por ou para a mocidade nos ámbitos da vida ao aire libre, social, deportivo, económico, cultural e outros.

2. Quedan sometidas ao contido da presente lei as actividades xuvenís de aire libre.

3. O desenvolvemento de actividades xuvenís por parte de entidades privadas requirirá a previa notificación da declaración responsable nos termos recollidos regulamentariamente.

Artigo 53. Actividades de aire libre

1. Para os efectos da presente lei, terán a consideración de actividades de aire libre:

- a. As acampadas
- b. As marchas voantes ou rutas
- c. Os campos de traballo

2. Para os efectos desta lei, terán a condición de promotores destas actividades as persoas físicas, asociacións, entidades ou empresas públicas e privadas, en desenvolvemento dun programa de actividades de tempo libre dirixido á xuventude.

3. Estas actividades de aire libre deberán de estar a cargo de persoas coa titulación suficiente nos termos recollidos regulamentariamente.

4. Cando participen menores de idade nas actividades de aire libre, requirirase que sexan acompañados da/s persoa/s que exerza/n a súa patria potestade ou tutela, ou, no seu defecto, contar coa autorización por escrito das devandita/s persoa/s.

CAPÍTULO IV. DAS INSTALACIÓNS XUVENÍS

Artigo 54. Tipoloxía de instalacións xuvenís

1. Para os efectos da presente lei, considéranse instalacións xuvenís as que pertencendo á Administración xeral da Comunidade Autónoma de Galicia, ás Administracións locais e a entidades privadas, se encontren ao servizo da mocidade, facilitándolle a súa convivencia, aloxamento, formación e participación en actividades sociais e culturais así como a axeitada utilización do tempo libre.

2. A tipoloxía das instalacións xuvenís axustarase ás seguintes categorías:

- a) Albergues xuvenís
- b) Campamentos xuvenís
- c) Granxas escola e aulas de natureza
- d) Residencias xuvenís
- e) Rede Galega de Centros de Xuventude.

3. Regulamentariamente estableceranse as características de cada unha das categorías establecidas no parágrafo anterior.

4. En todo caso, estas instalacións xuvenís deberán de manterse e conservarse en condicións óptimas de habilitabilidade, seguridade e salubridade.

Artigo 55. A Rede de Albergues Xuvenís de Galicia

1. A Rede de Albergues Xuvenís de Galicia estará constituída por todos os albergues xuvenís situados dentro do territorio da Comunidade Autónoma de Galicia de titularidade da Xunta de Galicia ou de calquera outra Administración pública.

Así mesmo, poderán formar parte da rede os albergues xestionados por persoas físicas ou xurídicas privadas que estean inscritos no rexistro regulado na presente lei.

2. A Rede de Albergues Xuvenís de Galicia será coordinada polo Instituto da Xuventude de Galicia, que procurará a máxima coordinación e colaboración coa Rede Nacional e Europea de Albergues Xuvenís.

3. O órgano superior con competencias en materia de xuventude adoptará un logotipo como distintivo da Rede de Albergues Xuvenís de Galicia.

CAPÍTULO V. OS CARNÉS DE SERVIZOS Á XUVENTUDE

Artigo 56. Finalidade

1. A Xunta de Galicia, a través do órgano superior con competencia en materia de xuventude, promoverá determinados beneficios relacionados co acceso de bens e servizos á xuventude. Potenciará distintos carnés, cuxos destinatarios sexan os mozos e mozas, para favorecer o seu acceso a servizos de carácter cultural, deportivo, recreativo, de consumo, de transporte e outros de análoga natureza.

2. O contido das prestacións será obxecto de desenvolvemento regulamentario.

Artigo 57. Prezos

A expedición destes carnés para a mocidade poderá levar consigo o pagamento dunha prestación económica que será cuantificada a través de desenvolvemento normativo nos termos da Lei 6/2003, do 9 de decembro,

de taxas, prezos e exaccións reguladoras da Comunidade Autónoma de Galicia.

TÍTULO V. DO RÉXIME SANCIONADOR

CAPÍTULO I. DA INSPECCIÓN EN MATERIA DE XUVENTUDE

Artigo 58. Competencias da inspección

1. A Administración da Comunidade Autónoma de Galicia tutelará o efectivo cumprimento do disposto na presente lei, asignando os medios materiais e persoais necesarios para o exercicio da función inspectora, sen prexuízo do respecto á potestade inspectora das Administracións locais no eido das súas competencias.

2. Nos supostos de inspección de actividades de aire libre, determinaranse regulamentariamente os mecanismos de coordinación entre as diferentes consellerías con competencias propias no exercicio da actividade de aire libre, para o desenvolvemento efectivo da actividade inspectora.

Artigo 59. Funcións da inspección

1. Sen prexuízo das actividades inspectoras reguladas noutras leis, a inspección en materia de xuventude exercerá, respecto aos contidos da presente lei, as seguintes funcións:

- a) Comprobar o cumprimento da normativa contida na presente lei, así como das normas que a desenvolvan.
- b) Controlar con posterioridade ao inicio da actividade o cumprimento das condicións comunicadas previamente ou declaradas de xeito responsable na prestación de servizos e instalacións xuvenís.
- c) Tramitar a documentación cumprida no exercicio da función inspectora.
- d) Verificar a veracidade dos feitos que foron obxecto de reclamacións ou denuncias de particulares e que resulten susceptibles de poder constituír unha infracción.
- e) Garantir os controis sobre a execución de actividades xuvenís que fosen obxecto de calquera tipo de axuda pública pola Xunta de Galicia, elevando os seus informes ao órgano administrativo competente.
- f) Propoñer a adopción de medidas preventivas que se consideren axustadas para garantir o cumprimento das disposicións da presente lei e demais normativa de aplicación e desenvolvemento.

g) As que regulamentariamente se lles atribúa.

2. A función inspectora axustarase aos principios de non discriminación, necesidade e proporcionalidade co obxecto que se persegue.

Artigo 60. Facultades de inspección

1. Os funcionarios habilitados para o exercicio das funcións de inspección ostentarán a consideración de autoridade no exercicio desta, gozando, por iso, da protección e atribucións establecidas na normativa vixente.

2. Os funcionarios habilitados para o exercicio da función inspectora poderán requirir a información e documentación necesaria para comprobar o correcto cumprimento das normas previstas na presente lei e na normativa de desenvolvemento desta.

Así mesmo, os funcionarios habilitados poderán acceder, libremente e sen previo aviso, aos locais, instalacións xuvenís, actividades e servizos regulados na presente lei e na normativa de desenvolvemento desta.

3. Os funcionarios habilitados no exercicio da función inspectora deberán identificarse en todo momento mostrando as credenciais que acrediten a súa condición, e poderán, así mesmo, solicitar o auxilio das forzas e corpos de seguridade.

4. Constitúe unha obriga inherente ao exercicio da función inspectora gardar segredo profesional sobre os feitos que coñezan no exercicio das súas funcións, e actuar, en todo momento, con suxeición ao disposto na presente lei e as normas que as desenvolvan regulamentariamente.

Artigo 61. Documentación da inspección

1. Como resultado da actividade inspectora, unha vez finalizada esta, levantarase acta de inspección, onde constarán os feitos observados así como, de ser o caso, a posible comisión dalgunha infracción prevista na presente lei derivada destes.

2. Os feitos constatados nunha acta de inspección cumprindo os requirimentos formais presúmense certos, sen prexuízo das probas que os interesados poidan achegar en defensa dos seus dereitos e intereses.

3. Regulamentariamente desenvolverase o contido e estrutura documental das actas de inspección en materia de xuventude.

CAPÍTULO II. INFRACCIÓNS E SANCIÓN

Artigo 62. Clasificación das infraccións

As Infraccións tipificadas nesta lei clasifícanse en leves, graves e moi graves.

Artigo 63. Infraccións leves

Constitúen infraccións leves as seguintes:

- a) Non facilitarlle á mocidade información e asesoramento por parte de calquera entidade integrante da Rede Galega de Información Xuvenil, así como o incumprimento dos horarios de atención á xuventude.
- b) Non exhibir nas dependencias que integran a Rede Galega de Información e Documentación Xuvenil o logotipo que identifica internacionalmente estes servizos.
- c) Incumprir a obriga de exhibir nas instalacións xuvenís o logotipo identificativo destas.
- d) Manter e conservar as instalacións xuvenís nun estado deficiente de habilitabilidade, seguridade e salubridade.
- e) Incumprir a normativa de réxime interno das instalacións xuvenís por parte dos usuarios destas.
- f) Utilizar as instalacións xuvenís para finalidades diferentes ás establecidas na correspondente declaración responsable.
- g) Permitir, en actividades xuvenís de tempo libre, a participación de menores de idade non acompañados da/s persoa/s que exerza/n a súa patria potestade ou tutela, ou sen contar coa autorización desta/s.
- h) Incumprir o prazos temporais fixados na declaración responsable para o desenvolvemento de actividades de aire libre así como as que se realicen en instalacións xuvenís.

Artigo 64. Infraccións graves

Constitúen infraccións graves as seguintes:

- a) O obstáculo da función inspectora sen que chegue a impedila.
- b) A comisión de tres ou máis infraccións leves no período dun ano.
- c) As establecidas como leves cando concorra algunha das seguintes circunstancias:
 - i. Que se causase un grave risco para a saúde ou a seguridade dos usuarios de actividades, servizos ou instalacións xuvenís.
 - ii. Que se causase un grave dano físico ou psíquico aos usuarios das actividades, servizos ou instalacións xuvenís.

- iii. Cando exista negligencia grave ou intencionalidade.
- d) O incumprimento das condicións de situación das instalacións xuvenís en función dos contidos da lexislación aplicable nesta materia e as que se determinen regulamentariamente.
- e) O incumprimento por parte das escolas de tempo libre da notificación previa da declaración responsable, así como das obrigas establecidas na presente lei e na normativa que a desenvolva.
- f) A realización de actividades de aire libre sen notificar previamente a declaración responsable.

Artigo 65. Infraccións moi graves

Constitúen infraccións moi graves as seguintes:

- a) A negativa ou obstáculo que chegue a impedir o labor inspector.
- b) As previstas como graves cando se dean algúns dos seguintes casos:
 - i. Que exista grave risco para a saúde ou a seguridade das persoas.
 - ii. Que exista grave dano físico ou psíquico causado por unha conduta na que se aprecie negligencia grave ou intencionalidade.
 - iii. Cando afecte a un gran número de usuarios das actividades ou servizos.
- c) A comisión de tres a máis faltas graves no período dun ano.
- d) A posta en marcha, no desenvolvemento de actividades dirixidas á mocidade en instalacións xuvenís, de actuacións que promovan o racismo, a xenofobia, a violencia ou outros comportamentos contrarios a valores democráticos.

Artigo 66. Sancións

1. As sancións aplicables ás infraccións tipificadas na presente lei poderán consistir en:

- a) Apercibimento
- b) Multa pecuniaria
- c) Clausura temporal ou definitiva da instalación xuvenil, escola de tempo libre, oficina local de información ou punto de información xuvenil.

- d) Inhabilitación temporal ou definitiva do persoal titulado nos ámbitos de servizos á xuventude.
- e) Inhabilitación para percibir subvencións ou axudas da Xunta de Galicia.

2. As infraccións tipificadas na presente lei serán sancionadas baixo os seguintes criterios:

- a) As infraccións leves sancionaranse con apercibimento e multa de 100 ata 1000 euros.
- b) As infraccións graves sancionaranse con multa de 1001 ata 3000 euros e coa imposibilidade de desenvolver actividades ou prestar servizos á xuventude por un período de tempo de ata seis meses.

Ademais, en función da natureza da infracción e do seu responsable, poderá impoñerse algunha das seguintes sancións:

- i. Clausura temporal da instalación xuvenil, escola de tempo libre, oficina local de información ou punto de información xuvenil por un período de ata tres anos.
 - ii. Inhabilitación por un período de ata tres anos do persoal titulado nos ámbitos dos servizos á xuventude.
 - iii. Inhabilitación para percibir subvencións ou axudas da Xunta de Galicia por un período de un a tres anos.
- c) As infraccións moi graves sancionaranse con multa de 3001 ata 6000 euros e coa imposibilidade de desenvolver actividades ou prestar servizos á xuventude por un período de tempo de ata doce meses.

Ademais, en función da natureza da infracción e do seu responsable, poderá impoñerse algunha das seguintes sancións:

- i. Clausura temporal da instalación xuvenil, escola de tempo libre, oficina local de información ou punto de información xuvenil por un período de catro a dez anos.
- ii. Inhabilitación por un período de catro a dez anos do persoal titulado nos ámbitos dos servizos á xuventude.
- iii. Inhabilitación para percibir subvencións ou axudas da Xunta de Galicia por un período de catro a dez anos.

3. Para a graduación das sancións terase en conta:

- a) O número de persoas afectadas
- b) Os prexuízos ocasionados
- c) O beneficio ilícito obtido

4. Con independencia da sanción imposta, o suxeito responsable está obrigado a resarcir os danos e prexuízos causados pola comisión da infracción.

Artigo 67. Competencia

1. A imposición de infraccións leves compete aos xefes territoriais da consellería competente en materia de xuventude da provincia onde se cometeu a infracción.

2. A imposición de sancións graves e moi graves compete ao órgano autonómico superior con competencia en xuventude, sen prexuízo do establecido no apartado seguinte.

3. A imposición de sancións moi graves que leve aparelada a clausura definitiva dunha instalación xuvenil, escola de tempo libre, oficina local de información ou punto de información xuvenil así como a inhabilitación definitiva do persoal titulado nos ámbitos dos servizos de xuventude compete á persoa titular do departamento con competencia en materia de xuventude.

Artigo 68. Suxeitos responsables

Serán responsables das infraccións administrativas tipificadas na presente lei as persoas físicas ou xurídicas, públicas ou privadas, que participen ou incorran nesta, aínda a título de simple inobservancia.

Artigo 69. Prescrición

1. As infraccións leves prescriben aos seis meses, as graves aos dous anos e as moi graves aos tres anos.

2. As sancións impostas por infraccións leves prescriben ao ano, as impostas por infraccións graves, aos dous anos e as impostas por infraccións moi graves, aos tres anos.

Artigo 70. Procedemento.

1. O exercicio da potestade sancionadora axustarase ao disposto na Lei 30/1992, do 26 de novembro, de réxime xurídico de Administracións públicas e procedemento administrativo común.

2. Os expedientes sancionadores serán incoados polo órgano competente que regulamentariamente se estableza.

3. Iniciado o procedemento, o órgano competente para resolver o expediente sancionador poderá adoptar de xeito motivado as medidas preventivas necesarias para asegurar a eficacia da resolución final que puidese recaer e salvagardar o interese público tutelado pola presente lei.

DISPOSICIÓN ADICIONAIS

Primeira. Título competencial

A presente lei ditase en virtude da competencia exclusiva que corresponde á Comunidade Autónoma galega en materia de promoción do deporte e axeitada utilización do lecer, asistencia social e promoción do desenvolvemento comunitario, segundo os títulos habilitantes contidos no artigo 27, apartados 22, 23 e 24 da Lei orgánica 1/1981, de 6 abril, pola que se aproba o Estatuto de Autonomía de Galicia.

Segunda. Extinción do Consello da Xuventude de Galicia

1. Coa entrada en vigor da presente lei producirase a integración do Consello da Xuventude de Galicia no departamento competente en materia de xuventude, e pasará a regularse nos termos do establecido na presente lei coa denominación de Consello Asesor e Consultivo de Xuventude Galicia.
2. O persoal que actualmente presta servizos no Consello da Xuventude de Galicia pasará a prestar servizos no Consello Asesor e Consultivo da Xuventude de Galicia regulado na presente lei, conservando o mesmo réxime xurídico e categoría profesional de orixe.
3. O departamento competente en materia de xuventude asumirá todos os bens e obrigas de titularidade do Consello da Xuventude de Galicia.

DISPOSICIÓNS TRANSITORIAS

Primeira. Comisión xestora do Consello Asesor e Consultivo da Xuventude de Galicia

1. No prazo de tres meses dende a entrada en vigor da presente lei, as entidades que forman parte do actual Consello da Xuventude de Galicia designarán unha comisión xestora, composta por un mínimo de cinco e un máximo de nove persoas, co obxecto de desenvolver as seguintes accións:
 - a) Elaborar o regulamento de réxime interior.
 - b) Designar o seu representante provisional no Comité Galego de Políticas de Xuventude, ata o nomeamento definitivo pola Asemblea Xeral do Consello Asesor e Consultivo de Galicia.
 - c) Realizar as accións necesarias para a adhesión das entidades ao Consello Asesor e Consultivo de Galicia.
 - d) Convocar, nun prazo máximo de seis meses dende a entrada en vigor da presente lei, a celebración da asemblea xeral constituínte que deberá ter como orde do día:
 - i. Elección da Presidencia.

- ii. Ratificación das accións realizadas pola comisión xestora, especialmente en materia de admisión de entidades membros.
- iii. Aprobación do regulamento de réxime interior.
- iv. Elección dos representantes da Asemblea Xeral no Observatorio Galego de Xuventude.

2. Se transcorrido o prazo de tres meses non se constituíse a comisión xestora, esta será designada polo órgano autonómico superior competente en materia de xuventude.

3. A comisión xestora prevista no parágrafo primeiro desta disposición transitoria rexerese para o seu funcionamento polo disposto na sección terceira do capítulo primeiro do título primeiro da Lei 16/2010, de 17 de decembro, de organización e funcionamento da Administración xeral e do sector público autonómico de Galicia.

Segunda. Convocatoria do Comité Galego de Políticas de Xuventude

Dentro do prazo de nove meses dende a entrada en vigor desta lei, celebrarase a primeira sesión do Comité Galego de Políticas de Xuventude.

Para tal efecto, o órgano autonómico superior competente en materia de xuventude realizará todas cantas xestións resulten necesarias para que, tanto os organismos públicos con representación neste, coma o Consello Asesor e Consultivo de Xuventude de Galicia, procedan á designación dos seus representantes no citado órgano.

DISPOSICIÓN DERROGATORIA

Única. Derrogación normativa

1. Quedan derrogadas cantas normas legais e regulamentarias preexistentes resulten contrarias ao contido da presente lei e, en particular as seguintes normas:

- a) Lei 2/1987, do 23 de marzo, do Consello da Xuventude de Galicia.
- b) Decreto 148/2008, de 26 de xuño, polo que se crea e regula o Observatorio Galego da Xuventude.

2. En tanto non entre en vigor a normativa de desenvolvemento da presente lei, resultarán de aplicación o Decreto 50/2000, do 20 de xaneiro, polo que se refunde e actualiza a normativa vixente en materia de xuventude, en todo en canto non se opoña ao establecido na presente lei e o decreto da súa adaptación á Directiva de servizos.

DISPOSICIÓN FINAIS

Primeira. Desenvolvemento normativo

Habílitate á Xunta de Galicia para ditar cantas disposicións sexan necesarias para o desenvolvemento e aplicación do establecido na presente lei.

Segunda. Entrada en vigor

Esta lei entrará en vigor aos vinte días da súa publicación no Diario Oficial de Galicia.